

PAGTULON-AN 14 – GIKAN SA DALAN SA SAAD NGADTO SA DALAN SA GINGHARIAN

1 Samuel 8 – 2 Samuel 6

TEMA: Pagpakita sa pagkawalay-hinungdan ang pagtugot sa kaugalingon nga magamando sa kinabuhi.

“Hatagi kami ug hari nga maoy magahukom kanamo,” mao kini ang gisulti sa tanang mga anciano sa Israel, “pagpili ug Hari alang kanamo aron magahukom kanamo sama sa ubang mga kanasuran.” Niining ilang gipangayo, gisalikway sa Israel si Jehova nga Dios ingon nga ilang Hari. Ug mipili sila ug usa ka tawo aron magamando kanila, 1 Samuel 8:5-7. Nangandoy sila ug hari nga ilang makita. Sila nangaluya sa paglakaw pinaagi sa pagtoo ug pagsalig sa mga saad sa Dios kanila. Mga buang-buang gayud ang mga Israelitas, 1 Samuel 10:18-19. Wala nila nasabti ang kasubo nga modangat kanila sa ilang hangyo; nga sa usa ka tawo nga magahari kanila, 1 Samuel 8:10-22.

Nahinumduman ba nimo ang atong bersikulo mahitungod sa dalan sa kinabuhi ug ang dalan sa kamatayon didto sa pagtulon-an uno (1)? Nakakita na kita ug daghang mga panig-ingnan sa mga tawo nga mipili sa usa ka dalan ug ang uban sa laing dalan. Dili lamang sa kinabuhi niining kalibutana ang pagpili sa dalan ngadto sa kinabuhing dayon o sa dalan sa kamatayon nga walay katapusan. Kondili mahitungod usab kini sa pagpili sa hustong dalan sa pag-alagad sa Dios, dinhi niining kalibutana human sa pagpili sa dalan ngadto sa kinabuhing dayon. Karon magahisgut kita sa duha ka mga hari, ang usa mipili sa pag-alagad sa Dios sa dili hustong paagi ug ang usa mipili sa hustong paagi.

Sa Buhat 13:38, si apostol Pablo nagatug-an kanato nga sulod sakwarenta (40) katuig ang Dios nagpatindog sa Israel didto sa kamingawan. Human sa paglaglag sa pito (7) ka mga nasud didto sa yuta sa Canaan, Iyang gibahinbahin ang ilang yuta ingon nga ilang panulondon. Siya mihatag ug mga maghuhukom hangtud kang Samuel nga propeta. Sa basahon sa Maghuhukom, makita nato giunsa niining mga maghuhukom ang paghusay sa mga problema sa Israel. Mabasa usab nato giunsa nila pag-away ug pagluwas sa nasud gikan sa pagkaulipon, pinaagi sa pagsakit sa ilang mga kaaway. Kining tanan nahitabo sulod sa upat ka gatus ug singkwenta (450) katuig, Buhat 13:19-20. Sa maong panahon, adunay daghang mga higayon sa dakung mga pagpakasala; pagsupak sa Kasugoan ug pagsimba sa mga diosdios. Ug karon sa pagpangayo nila sa usa ka tawo nga mahimong hari nila, ang Israel nakahimo ug dugang nga sala.

Ang unang gipili nga hari mao si Saulo. Siya usa ka ambongan ug taas nga tawo, 1 Samuel 9:2. Siya gikahimut-an sa panan-aw sa mga tawo ug busa sila naniyagit nga nag-ingon, “Mabuhi ang Hari!”, 1 Samuel 10:24. Apan ang Dios wala nahimuot sa dihang Iyang nakita ang kasingkasing ni Saulo. Atong tan-awon unsa ang gibuhay ni Saulo nga nagpamatuod kon unsa ang naa sa iyang kasingkasing.

Didto sa imong mapa, imong makita nga adunay pagliko sa dalan diin ang DALAN SA SAAD nahimong DALAN SA GINGHARIAN. Sa dihang misugod na si Saulo sa paghari, iyang gipangulohan ang katawhan batok sa ilang mga kaaway, ang mga Filistihanon. Ang Israel mibati ug dakung kahadlok. Si Saulo nakahibalo nga kinahanglan siya mohulat ug pito (7) ka adlaw kang Samuel, aron magahalad ug halad-nga-sinunog ug halad sa pakigdait. Apan, si Saulo wala makahulat ug mihukom nga siya na lang ang maghimo sa halad. Sa diha nga nahuman na siya sa paghalad sa halad-nga-sinunog, si Samuel miabut. Mga pulong sa pagbadlong gisulti: “Ikaw nagabuhat ug usa ka binuang; ang imong gingharian dili magdugay. Si JEHOVA nangita alang Kaniya ug usa ka tawo nga sibo sa Iyang kasingkasing; “1 Samuel 13:1-14.

Si Saulo misupak na usab human sa gubat kang Amalek. Wala niya laglaga ang tanan sumala sa gisugo kaniya, 1 Samuel 15:1-23. Ug busa, ang Dios misalikway kang Saulo ingon nga hari.



Tinubdan: Sweet Publishing – kini ilustrasyon lamang sa 1 Samuel 17:49

Karon, ang Dios nagpili ug lain nga tawo nga sibo sa Iyang kasingkasing ingon sa Iyang gisaad, 1 Samuel 16:7. Ang iyang ngalan mao si David, ug si Samuel nagadihog kaniya. Si David nahimong tigdala sa hinagiban ni Saulo, 1 Samuel 16:21. Karon atong makita ang gibuhay ni David sa pagpamatuod unsa ang anaa sa iyang kasingkasing.

Sa 1 Samuel 17, atong mabasa ang tibuok kasaysayan giunsa ni David pagpatay kang Goliath, ang kampeon sa mga Filistihanon. Si David mipamatuod nga siya maisug, mapaubsanon, matinud-anon, usa ka tawo sa pagtoo; nga mohatag ug himaya sa Dios, 1 Samuel 17:37, 45-46.

Si Haring Saulo nahimong masinahon ug wala mohatag sa iyang trono kang David. Hinuon si Saulo naninguha sa pagpatay kang David, 1 Samuel 18:1-14. Ug si David kinahanglan moikyas tungod sa iyang kinabuhi. Mitago siya sa daghang mga katuigan, apan ang Dios nagauban kaniya ug nagabantay kaniya nga luwas.

Si David mipili sa dalan sa pagtoo aron sa pag-alagad sa Dios. Si Saulo, sa laing bahin, midaus-os ug midaus-os hangtud siya nangayo ug tambag, 1 Samuel 28:7-19. Kini usa ka pagsupak sa Kasugoan nga gihisgutan sa Levitico 19:31. Ang espiritista gigamit nga paagi sa pagtug-an kang Saulo mahitungod sa umalabut niya nga kamatayon. Si Saulo sa una pa niini miangkong: “Ako nagadula ingon sa buang”, 1 Samuel 26:21. Iyang gipili ang dalan *nga daw matarung* alang sa tawo apan napamatud-an nga kini dalan sa kamatayon.

Human sa kamatayon ni Saulo, si David naghari sulod sakwarenta (40) katuig, 2 Samuel 5:4. Mao usab kini ang gidugayon sa paghari ni Saulo sa Israel, Buhat 13:21. Sa 1 Samuel 13:1, atong mabasa nga si Saulo naghari sa Israel sulod sa duha (2) katuig. Unsaon ba nato pag-ila ang sa kalainan? Human sa duha (2) katuig, si Saulo gisalikway ingon nga Hari sa espirituhangong kahulogan (1 Samuel 15:23), apan nagapabilin siya sa kahimtang ingon nga Hari sa Israel sulod sakwarenta (40) katuig.

Si David nag-edad ug 30 katuig sa dihang nahimo siyang hari, 2 Samuel 5:4. Siya natawo sa ikanapulo (10) katuig sa paghari ni Saulo. Nahibalo kita nga si Jonathan, ang anak ni Saulo, miguba sa kampo sa mga Filistihanon sa pagsugod sa paghari sa iyang amahan, 1 Samuel 13:3. Siya nagapangidaron na ug byante (20) katuig sa maong panahon, Numeros 1:3. Si Jonathan nag-edad ug traynta (30) katuig sa dihang natawo si David. Kon si David kinse (15) katuig ang edad sa dihang napatay niya si Goliath, si Jonathankwarentay singko (45) katuig ang edad sa dihang nagkahigalaay sila ni David.

Si Jonathan maoy usa sa mga tawo nga adunay espirituhangong panghunahuna ug matarung nga tawo. Bisan tuod siya ang sunod sa linya sa pagkahari, si Jonathan midawat sa pulong sa Dios nga si David ang sunod nga hari (usa ka butang nga wala dawata sa iyang amahan nga si Saulo).

Samtang ang uban mopatay aron lang mahimong hari, si Jonathan mitugyan sa trono ngadto kang David. Si Jonathan ug si David sama ug panghunahuna, sama ug pagtoo ug suod nga managhigala nga naghigugmaay sa usag-usa.

Si haring Saulo mibarug diha sa iyang karaang kinaiya sa pagkadautan sa tawo. Si Haring David mibarug diha sa bag-o nga espirituhanong kinaiya, diin kita motugyan sa atong kaugalingon niini human kita misalig sa Ginoong Jesu-Cristo ingon nga atong kaugalingong Manluluwas gikan sa impiyerno.

Si Cristo nahimong atong kaalam gikan sa Dios (1 Corinto 1:30), ug ang iyang ngalan Kahibulongang Magtatambag, (Isaiah 9:6). Proverbio 12:15 nagatug-an kanato: “Ang dalan sa usa ka buang matarung man sa iyang kaugalingong mga mata; apan kadtong manggialamon nagapamati ug tambag.”

Maingon nga si Saulo naninguha sa pagpatay kang David sa daghang higayon, ang karaang kinaiya sa kanunay nagatinguha sa pagpatay sa bag-o nga kinaiya. Asa ka gusto nga magtugyan sa imong kaugalingon sa nahabiling panahon sa imong kinabuhi dinhi sa kalibutan? Gusto ka ba nga mahimong buang-buang o maalamon? Si Ginoong Jesu-Cristo gusto nga mahimo nimong Kahibulongang Magtatambag. Usa ka kaalam nga magatugyan ka sa imong kinabuhi ngadto Kaniya.

SAG-ULOHON NGA BERSIKULO: “Ang dalan sa usa ka buang matarung man sa iyang kaugalingong mga mata; apan kadtong manggialamon nagapamati ug tambag.” Proverbio 12:15.

PAGTULON-AN 14 – BULOHATON

Direksyon: Isulat ang hustong tubag sa mga pamahayag o pangutana.

1. Ngano nga ang DALAN SA KINABUHI gitawag naman karon ug DALAN SA GINGHARIAN? 1 Samuel 8:5-6 _____
_____.

Unsa man ang tulo (3) ka dagkung lakang ni Saulo nga padaus-os gikan sa dapit sa kadunganan ingon nga Hari?

2. 1 Samuel 13:9 _____,
(1 Samuel 13:13) _____,
_____. (1 Samuel 13:14).

3. 1 Samuel 15:9 _____,
(1 Samuel 15:23) _____
_____.

4. 1 Samuel 28:7 _____
_____. (1 Samuel 28:19).

Unsa man ang tulo (3) ka mga dagkung butang diha kang David nga nagapakita nga siya angayan mahimong Hari?

5. 1 Samuel 16:7 _____
_____.

6. 1 Samuel 17:45 _____
_____.

7. 1 Samuel 18:5 _____
_____.

8. Sumala sa Proverbio 12:15, ngano nga makaingon ka man nga si Saulo usa ka buang-buang. _____.

9. Unsaon ba nato nga makaangkon kita sa kaalam? 1 Corinto 1:30. _____
_____.

10. Isulat ang Proverbio 12:15: _____
_____.